

欽定剿平粵匪方略

欽定剿平粵匪方略卷一百七十四 丁巳年

五月初二日 壬子 胡林翼奏言查鄂省克復後該

匪日思上犯武漢三月二十六日安徽布政使

李孟羣率二千五百人援皖啟行後 臣 接據署

蘄州知州彭應鯉稟報探得悍賊七八千人於

四月初四日竄踞安徽英山縣城又由六安霍

山壽州等處分股上竄當卽飛調各團分扼要

隘親督練勇赴英山羅田交界之樂利河駐紮
署蘄水縣知縣劉緊督勇駐該縣之雞鳴河查
爾山朱洋河一帶適李孟羣援皖之師亦至卽
飭都司盧又能集於羅田境上初五日彭應鯉
擊賊梁家灘勝之初六日英山之賊分股出撲
我營彭應鯉又勝之斬三百餘名生擒六十七
名盧又能截賊於途斬大旗手七名追至枬梓

堰生擒四十名而返賊卽退回英山初七日賊
添集六安霍山之衆又至廬又熊戰於樂利河
身受多傷勇丁稍卻李孟羣揮軍援之仍將賊
擊退次日賊分五路撲雞鳴河一帶把總徐兆
達會同紳勇擊退初九日羅田團勇擊擄糧之
賊獲米百餘石而是日酉刻斬水團勇失利於
雞鳴河李孟羣飭廬又熊率師往援仍有斬擒

賊乃於一晝夜內合數路之衆併力齊撲意在乘虛而上彭應鯉探聞準備李孟羣卽飭參將趙鴻舉等分投迎勦密令羅田縣在籍同知廖新率團勇抄賊之後十一日賊隊大至我軍一由兩河口攻其南一由四口塘攻其北一由西路攻樂利河彭應鯉由大畈河戴家畈等處進駐扼賊下竄自辰至申鏖戰四時之久斃賊二

千餘名生擒三百餘名反走之賊則爲廖新之
勇迎頭截擊彭應鯉率勇乘勝克復英山縣城
其竄至雞鳴河之賊經盧又熊會斬羅各勇截
於河干使不能越遂向太湖一帶東竄現在各
軍回剿蘄州之賊查北岸之黃梅廣濟羅田蘄
水皆與皖省接界據李孟羣稟稱自羅田橫至
蘄水蘄州之界有賊營十餘處而蘄州蘄水另

有股匪萬餘分道竄入下游官軍均在賊後請
卽派兵援勦遏其上竄臣查皖省宿太等處無
處非賊豫省三河尖等處賊燄尙熾江甯將軍
都興阿咨稱大股賊衆竄逼必須添益兵力臣
卽飛調興國防兵二千五百人於四月十二日
由蘄州渡江進紮張家塆又調前赴襄陽之寶
義兩營回省而先派參將葉永泰率虎營六百

人自省馳赴北岸會同堵剿不敢稍分畛域且
使援皖之師無虞後路梗塞仍飛飭李孟羣迅
卽取道六安馳赴廬州至彭應鯉率領羅田團
勇越境討賊疊著戰功此次克復英山尤堪嘉
尚李孟羣以援皖之師途次接仗亦協機宜所
有尤爲出力之知州彭應鯉可否以知府用其
餘出力官紳員弁應請查明彙獎奏入

上諭內閣曰賊匪竄踞安徽英山縣經援兵疊勝收復
城池勦辦尙爲得手著卽乘勝進攻俾北岸一帶迅
就肅清所有尤爲出力之湖北署蘄州知州彭應鯉
著以知府用其餘在事出力員弁並著官文胡林翼
查明保奏

初五日 乙卯 德興阿翁同書奏言瓜州逆匪受創

驚怯四月十七日 臣等令東西兩岸兵勇分投

進勦總兵陳國泰駕師船駛近瓜隄轟擊水陸
兵勇互爲接應城上之賊紛紛喧嚷用大礮多
裝羣子憑高俯擊有黃衣賊目往來指揮被我
軍開礮擊中三四名東岸官兵佯退誘賊下瓜
州果出賊匪五六百人意圖追襲總兵鞠殿華
等帶隊回擊斃賊四十餘名生擒十五名餘匪
竄回十九日令鞠殿華等豫伏兵勇於王家大

院一帶又令侍衛蘊秀等分帶馬步隊緊攻上
中瓜州使賊黨併集抵拒其下瓜州賊營以外
不設一兵鞠殿華等乘虛偪近玉皇閣賊營逆
黨突出阻我進路接戰方酣總管海全等由四
里鋪斜衝而來首尾夾擊殺賊數百名生擒十
四名壘中之賊搖旗吹螺該逆遂從蘆葦中抄
小路而遁臣等以該逆處處有備屢攻未下令

各將領於東西兩岸逐日埋伏賊出卽擊二十三日參領富明阿伏兵於西岸之富家井白廟等處令馬隊數人至賊營挑戰該逆見我兵單卽從上瓜州出賊三四百名我兵且戰且走引賊深入伏兵齊發斃賊七八十名參將王巨孝等領步隊聯絡助勢馬隊馳突緊追截其後路生擒老賊十八名其投水未經淹斃者又生擒

三十名臣等查該逆久踞我軍嚴防出掠冀以制其死命現據獲匪供稱賊由金陵運糧至石埠橋屯聚擬由南岸陸續運至鎮江分給瓜州又稱賊謀竄仙女廟邵伯等處臣等惟有嚴飭水陸各軍加意扼截仍隨時密約鎮江官軍同時並舉竭力籌攻不敢稍事因循現聞句容溧水疊獲大勝賊情窮蹙俟兩處克復南岸官軍

屯紮高資斷賊接濟庶瓜鎮兩巢可期得手奏

八

上諭曰仍著實力進攻不可專俟江南捷信

德興阿翁同書又奏言臣等前以江浦之賊負

嵎堅拒而揚營正力擣瓜州因暫由浦口選精
兵三百餘名來揚以佐兵力並飭總兵安勇等
妥籌堵剿昨據安勇等稟稱四月十六日探知

九湫洲賊匪在新埂頭等處支搭跳板意圖竄撲浦口當卽督隊往勦生擒賊匪十五名燒燬卡房五座斃賊無數又據稟稱探聞江浦賊匪多撥往句容溧水城內空虛因密飭大軍馳往攻襲並知會水師同時進攻九湫洲十九日浦軍大隊分兩路前進副都統富春等攻東南門安勇同總管台斐音保攻西北門總兵羅玉斌

等分路埋伏署江浦縣知縣袁瑞麟等帶勇助
勦城內之賊亦分兩路突出五六百人拒敵我
兵以步隊迎擊以馬隊旁抄鏖戰一時之久賊
勢不支兵勇奮力追勦生擒賊目五名殲斃賊
目十三名賊衆五百餘名餘匪退回城中是日
南岸駛來賊船十數隻直趨九洲洲時水師總
兵葉常春等聞陸路礮聲已令師船迎風上駛

開礮轟擊立沈賊船五隻奪獲五隻逆匪落水
淹斃無算二十二日安勇等復議進攻兩處賊
巢馬步官兵於距江浦城六七里之蘆花園突
遇伏賊奮力掩殺馬隊左右抄襲賊卽敗竄我
軍乘勝追殺斃賊五十餘名又擊退南門接應
賊匪陣斃三百餘名同時南岸七里洲賊船連
檣下駛下關亦有賊划數十銜尾而來葉常春

聞

督師船往來轟擊沈燬大小賊船十數隻奪獲
七隻並將九狀洲隄口賊匪轟斃數百名平毀
賊壘十四座等情前來臣等仍飭令實力進攻
迅圖克復奏入報

初七日巳丁文俊奏言瑞郡踞匪因我軍開挖長

濠接濟已斷日漸窮蹙四月初一等日屢次出

撲均經劉騰鴻等擊回惟該逆於下游搭造浮橋伺隙旁竄臣現飭各營嚴密巡防妥籌截擊至臨江之賊自陰岡嶺敗後大半回竄撫州其勢已弱祇以城池堅固尙敢負隅抗拒現經劉長佑王鑫蕭啟江劉于瀆水陸圍攻四月初一初六等日疊獲勝仗燒燬逆匪附城礮臺我軍已於城之西南東北兩面築營並將沙湖地方

小河挑挖深通從此水師得以據險進攻與陸路各營四面環擊臣仍隨時督飭激勵以期迅下堅城奏入

上諭曰瑞臨兩處漸有轉機著趕緊飭令攻勦迅期掃蕩勿任餘賊負隅又竄擾他處徒受牽掣

文俊又奏言贛郡逆匪自上年九月疊經攻勦獲勝後廣東潮州鎮總兵壽山署贛州鎮總兵

阿隆阿護理吉南贛甯道汪報閏會派潮贛兵
勇並各村田勇攻勦車村王母渡等處大小四
十餘戰殺賊不計其數焚燬匪巢多處並令參
將遮克敦布等率兵勇進紮大塘口攻破湖頭
墟等處賊巢勦洗塘江竄匪外委何世彬等攻
破王母渡後卽在該處紮營與遮克敦布等軍
漸逼潭口十一十二兩月各軍或分路進攻或

會合堯勦蹋毀樟樹坪等處賊巢數十殺賊甚多並經把總卓興帶勇進紮竹壩灘與大塘口之營聲勢聯絡屢次過河襲擊殺賊無數賊營悉毀召回被脅難民萬餘已革知府周汝筠率兵勇在鏡壩臺頭沙等處先後百餘戰勦平賊巢八十餘處召回難民四千餘人本年正月初旬潮賴各軍步步進攻每戰必捷將夜坑小壩

等處匪黨殲擒殆盡自是潭口附近匪穴掃蕩
無遺惟潭口逆匪負固抗拒壽山阿隆阿汪報
聞移營進逼賊壘訂期正月十四日大舉環攻
卓興等各領兵勇自馬房洞大塘口分路前進
會攻潭口西北周汝筠等領兵勇由南康大路
進攻潭口之南該逆站牆死拒礮石如雨我軍
冒煙奮進卓興持矛先登躍入土牆刺倒賊目

五名賊隊遂亂金國樑等各率所部擁入孫福同遮克敦布等同時由西面衝入刀矛並舉殺賊不少縱火焚燬煙燄蔽空該逆棄營奔竄自相踐蹋死者尤多並經周汝筠等截擊潮贛各軍四面包圍斃匪三千餘人生擒四百三十二名賊渠九名奪獲賊船五十餘隻焚燬賊寨二百餘座敗匪逃至楊埠地方又被鄉團截殺多

名餘俱逃往信豐羅村一帶而去潭口地面當
卽蕩平至崇義縣城自上年七月被陷後九月
間大股賊匪由鉛礮竄撲南安府城知府廣
等率兵勇死戰賊匪遁去隨飭署崇義縣知縣
何允廉等分路進攻並派府經歷張翰等管帶
郡兵會剿何允廉自湖南招募壯勇二千餘名
又調到南康田勇三百名陸鈞亦添選練勇三

千餘名並勸諭遠村田勇協助自十月二十至
二十六等日七次攻城斃匪五百餘名十一月
初間連次圍攻獲勝擊敗援賊十二日何允廉
等各軍併力合圍槍斃賊首王明金等數名陸
鈞率勇緣城而上何允廉督勇拋擲火彈城內
火起賊衆慌亂何允廉等一齊登城合力兜殺
殲賊一千三百餘人生擒五十餘名餘匪開門

四竄又經城外紳勇擊斃一千餘人生擒三十餘名落河淹斃者尤衆當將城池克復其上猶縣營前地方餘匪亦經兵勇勦滅南安屬境一律肅清惟贛州府屬之信豐縣被匪竄擾勢甚危急經署知府楊豫成稟商汪報閏調南康南雄各勇前往救援下游萬安縣之賊亦經該鎮道商令遮克敦布帶兵往勦已飭迅速翦除毋

留餘孽所有蕩平潭口克復崇義尤爲出力員
弁先行開列額懇

恩施以昭激勸其餘在事員弁紳勇容俟查明另行請
獎奏入

上諭內閣曰官兵攻破潭口等處賊巢克復崇義縣城
並將上猶餘匪勦滅辦理甚屬得手廣東潮州鎮總
兵壽山署贛州鎮總兵阿隆阿均著賞戴花翎並交

部從優議敘護理吉南贛甯道調補南昌府知府汪
報閏著交軍機處記名以道員請旨簡放並賞戴花
翎參將遮克敦布著以副將儘先補用都司金國樑
趙濟川均著以遊擊卽補守備孔慶林著以都司卽
補把總卓興著以守備卽補從九品孫福同著以知
縣選用並賞加知州銜賞給該員父母五品封典已
革儘先補用知府周汝筠著開復原官賞還翎頂署

贛州府事甯都直隸州知州楊豫成南安府知府廣
勇均著免其失守屬境處分其餘在事出力文武員
弁紳勇著准其擇尤保奏以示鼓勵

文俊又奏言上年十月初信豐縣賊匪三千餘
人竄至龍南縣馮灣地方經署知縣馬修良會
督兵勇斃賊五百餘名生擒五十九名餘匪翻
山而逃又被水西葉坊等處紳勇追殺四百餘

名生擒十名餘俱竄回信豐十二月間復有匪黨七八千人竄入龍南縣澗田大龍堡等處馬修良督勇往勦殺賊百餘該逆敗退劫頭觀音閣勾結定南信豐之賊聚衆萬餘馬修良調勇七千餘名接仗十七次俱有斬擒解散脅從六千餘人正月初二日逆衆圍攻觀音閣通判周兆熊等帶勇出擊適馬修良馳至夾攻賊匪敗

退將軍山憑險不出我軍環山開濠外築土城
以期聚而殲旃二十日信豐定南賊衆五六千
人由東坑入境圖襲龍南縣城馬修良分兵回
援添調鄉勇三千餘名於栗樹園地方遇賊接
戰殲擒四百餘人奪獲礮械無數餘匪敗回信
豐二十五日馬修良率師仍赴大龍堡圍攻將
軍山之賊匪黨千餘人來援馬修良撥紳勇馳

往嶂背地方邀擊斃匪七百餘人生擒賊目及
夥賊一百十七名敗匪四散又經各隘防勇截
殺殆盡二月初一日將軍山之賊乘大風雨踰
溝越牆拌死逃竄馬修良等率衆奮擊殺賊千
餘生擒九百名逃逸之賊經各村紳民沿途截
殺二千餘名其凍餒自縊及墜崖死者林谷爲
徧龍南境內肅清署安遠縣知縣張仁法於上

年攻破錫坑村賊營後四月十七日進攻新塘
尾中有石圍藏賊千餘連攻未下賊首勾結大
股匪黨分路來援張仁法卽帶勇迎擊斬首七
十餘級連日追勦殺賊無算南鄉匪徒淨盡定
南廳自上年夏間被匪圍攻擊退後仍來滋擾
經知府楊豫成飭團勇勦辦頗有斬馘甯都州
城於本年二月間被永豐樂安等縣匪徒攻陷

聞

知縣潘敏瑞卽派勇往賴村一帶會同紳團堵
勦殺賊一百八十餘人現飭該鎮道派兵會同
勦辦以期及早收復勿任久踞爲患奏入報

初九日己未官文都興阿胡林翼奏言臣官文胡

林翼接據安徽布政使李孟羣稟報賊首陳玉
城由桐城率三萬餘衆又裹脅皖省饑民數萬

併力上犯已分道竄入黃梅廣濟蘄州蘄水羅
田五州縣境希圖梗截大營後路並以阻遏援
皖之師路歧賊衆防不勝防亟應厚集兵力以
資堵剿等語臣等再四籌商實無可增之兵祇
能移緩救急當抽調李續賓所部一千五百人
渡江駐小池口而以原駐小池口鮑超五營分
移孔壠黃梅其蘄州羅田一帶則調興國防兵

福武寶三營渡江應援恭鳳二營繼之又由省
調虎營六百人助勦李孟羣援皖之師則由羅
田直抵英山遏其上竄四月十八日知縣李景
湖率福營都司金殿安率前左寶營守備余雲
龍率武營由青石嶺大路前進署蘄州知州彭
應鯉都司盧又熊等率羅田勇由王家壩小路
前進同攻張家塆賊與青石嶺官軍相持羅田

勇抄後來擊盧又熊督勇接應大勝之斃賊千
餘名內有僞指揮一名十九日賊衆大股來犯
福武寶各營三路分進賊又分七路來衝李景
湖率勇直前斬悍賊數十名賊勢稍卻而七路
之賊漫山遍野寶武二營爲賊隔截李景湖率
千總張鵬高等衝突鏖戰衆寡不敵同時陣亡
參將張寅恭揮兵迎擊福武寶三營又回兵合

攻斃賊數百名賊始敗退二十日參將葉永泰
率虎營至都司徐統恩率鳳營亦至賊於河北
分六股河南分八股約萬餘衆各營堅壁以待
賊數次誘戰相持不動日午賊懈始尾追之頗
有斬獲次日賊又分股萬餘竄撲夫子嶺蘄州
青石嶺各營因營官戰歿軍中缺食勇丁稍潰
其不潰者退保蘄州臣胡林翼飛調候補知府

邢高魁由興國渡江一面籌運米石飭令重加
整頓力扼蘄州又加派都司段清平等率平超
二營一千二百人由省疾趨黃州會同署黃州
府知府許廣藻署黃岡縣知縣黎道鈞扼蘄水
上竄之路臣官文先期調副都統舒保所部馬
隊百人由襄陽回援副都統銜巴揚阿遣散川
勇甫抵宜昌亦檄令迅速回援此賊犯蘄羅互

有勝敗並抽調救援之情形也臣都興阿駐下
游陸家嘴偵知賊竄黃梅縣屬之亭前驛渡河
橋一帶隨派多隆阿率馬隊往勦四月二十日
賊分三路各萬餘來撲縣城多隆阿同王國才
及各營總分路擊之馬隊踰溝越嶺追賊過河
燬賊壘二座忽賊由山坳抄我步軍之後我軍
回騎渡河策應斃賊四百餘名探知各處賊壘

共六十餘座我軍馬步分防相距百餘里策應不便派鮑超以霆字二營移孔壠李續賓以九江三營移陸家嘴而小池口之賊乘間突出經營總巴克坦布等督隊馳勦都興阿由孔壠督隊接應擒斬頗多先是賊伏二三千於蘆葦中而以悍賊數百誘戰官軍在江岸遙見蘆葦隱動遂以槍箭環施馬隊亦由江岸抄擊立斃伏

賊七百餘名生擒九十名餘皆帶傷而逃是夜
我軍分百人潛過渡河橋攜帶火器伏於麥田
深處二十四日都興阿率馬步隊攻渡河橋多
隆阿等各帶馬步隊分路齊進賊屬聚數萬隔
河對放槍礮我軍鼓勇渡河立破賊營數座賊
卽反奔我伏兵遂向各營壘拋擲火彈賊益驚
潰焚燬賊壘二十七座斃賊二千數百名此下

游馬步各軍移動獲勝之情形也臣等查武漢克復後該逆無日不思上竄且自江甯桐城安慶至於九江千里而遙沿江並無官軍阻截饑民游勇濶入賊中非合全軍之力不能截遏賊鋒查九江及興國各營均已抽撥移紮而寶義平超四營又分赴黃州蘄水省城守兵不滿千名添兵則餉無可籌餉竭則兵心益渙現在楊

載福水師聯布江面尙爲安靜馬隊千餘疊次
力戰頗覺疲勞已飛催舒保巴揚阿訥依璋阿
各率馬隊馳赴策應除飭各路水陸馬步乘勝
力攻外所有陣亡知縣李景湖等可否仰懇
天恩從優議卹以慰忠魂奏入

上諭內閣曰皖省賊匪分竄湖北蘄州蘄水邊界經官
文等調援策應疊獲勝仗大挫賊鋒著卽激勵將弁

乘勝進攻將續至援賊盡數殲除毋令上竄所有陣亡之知縣李景湖著照知府例從優議卹千總張鵬高楊高桂均著照都司例從優議卹把總胡開禮六品翎頂朱大倫均著照千總例從優議卹

同日福興奏言臣前因江西省城南路兵力不敷移咨湖北督撫臣官文胡林翼分調九江李續賓之軍旋准覆稱該處合圍甚緊若分兵南

移恐賊乘隙上犯實難分撥等語九江之兵旣無可撥則規復撫建之議須待瑞臨得勝之師而廣信節次告警勢難株守省垣臣卽於四月初三日自省星馳赴信途次探知婺源之賊續行闌入江境分擾德興樂平一帶欲由弋陽趨入河口鎮臣一面撥兵赴弋陽迎截一面暫駐河口相機堵剿該逆聞風回遁不敢向前惟賊

蹤飄忽無常前此調防河口之師尙未到鎮臣
先就廣信存城兵勇抽撥六百名派都司馮日
坤等帶往扼堵以期兼顧臣由河口到廣信後
民心漸定但該處界連浙閩歧途四出不但所
屬之鉛山廣豐時虞匪蹤竄突卽毗連之江山
等處亦恐乘虛而來臣惟就現有兵勇力籌堵
剿並隨時知會留駐衢防之署總兵饒廷選無

分畛域扼要嚴防以期聯絡聲勢至瑞城之賊
因被圍甚緊屢欲撲竄無隙可乘四月初五日
傾巢而出經劉騰鴻等奮力迎擊鏖戰半日斃
賊多名該逆敗退城上礮子如雨我軍未能向
前嗣復連日出撲意欲疲我師力伺隙而逃節
經臣嚴飭各營務期聚而殲旃勿任殘匪狡脫
臨江一路現因江水驟漲水軍直逼城濠轟塌

聞

賊壘數處知府蕭啟江等已可與道員王鑫一
軍會合進攻並議將新到援師渡河而東直擣
新淦兼徇旁邑以撼撫建之勢斷賊援應臣隨
時飛飭各該員弁迅圖克復堅城分兵東勦奏
入報

初十日
庚申和春奏言四月十七日我軍分路進

攻句容縣城逆匪堅守不出兵勇撲至濠邊拔
椿欲進西北兩門各出賊千名飛奔來援意在
抄我後路副將王浚等帶兵分途迎擊該逆愈
來愈多張國樑帶隊從左面衝殺臣和春親領
馬隊由右首抄出三面夾擊逆衆拌死抵拒張
國樑揮兵槍斃騎馬悍賊數名賊勢大敗我軍
追至濠邊斃賊五六百名生擒七名其南門之

賊經明安泰督軍攻擊匿不出巢兵勇佯退潛
伏忽出賊千餘分途來撲官軍突出槍礮刀矛
齊施賊遂敗退追至濠邊殲斃二百餘名二十
九日我軍分攻北南二門及城外賊壘並令參
將戴文英領兵赴西門一帶擇要埋伏一面上
前誘敵北門賊匿不出西門之賊見我軍無多
突出千餘人遙擁而來戴文英揮兵迎擊且戰

且走誘至西土岡伏兵突出夾擊殲斃無算賊
勢漸卻我軍追殺又斃賊多名西北二門出賊
千餘來援張國樑督兵勇開礮擊斃無數臣親
帶馬隊橫衝而出官軍會合槍矛奮擊佐以火
器屍橫遍野賊衆敗走我軍追至外濠南門突
出賊千餘經兵勇痛勦殲斃甚多該逆敗退我
軍追擊正在得手小南門又出賊千餘猛撲我

軍左右夾攻斃匪不少鏖戰多時賊拒不退參將滿祿衝入賊隊立刺悍賊數名落馬逆衆驚潰該參將同守備劉信忠帶兵追至濠邊中礮陣亡是日兩路共約斃賊五百餘名生擒十一名除趕緊進攻迅圖克復外所有陣亡參將滿祿守備劉信忠應請

旨飭部從優議卹以慰忠魂

和春又奏言據余萬清呈稱四月十八日副都
統巴棟阿等帶領兵勇進攻鎮江南水關及虎
頭山賊營並先於隄下擇要埋伏賊營突出二
三千人見兵勇無多蠶擁來撲我軍且戰且走
誘至隄上伏兵突出包抄立斃多名逆衆敗潰
又追殺無數金山復出賊數百來援經遊擊王
夢熊等擊退是日約斃賊二百餘名二十二日

我軍直逼城下仰攻正在拔樁而進南門南水關各出賊千餘分股來迎我軍奮擊斃賊數十王夢熊等左右夾攻參將吳世斌帶兵繞至賊後三面痛勦逆衆驚潰兵勇追擊殲斃甚衆並將五峯口一帶賊築濠牆全行平毀是日約斃賊三四百名又據傅振邦虎嵩林稟稱四月初六日率兵分攻溧水西北二門數時之久該逆

死守不出我軍甫欲撤隊兩門各突出數百人
來撲兵勇分途迎擊殲斃數十名賊卽退走把
總謝用貴追過重濠中礮陣亡十六日我軍分
攻西北門及城外賊營該逆分途迎拒兵勇奮
力痛勦逆屍枕藉賊敗入巢乘勝焚燬賊卡二
道斃賊五百餘名生擒僞將軍戴復生及賊衆
三名陣亡千總蔣占元一員受傷兵勇卅餘名

二十日探得援賊四五千人在開泰村博望一帶築壘意圖分路前進卽帶馬步隊前往攻勦該逆恃衆抗拒我軍槍斃多名抵死不退張玉良等首先衝入槍斃騎馬悍賊二十名李定太從旁抄襲周天培等攔擊斬馘尤多賊勢漸卻追至濠邊將賊營合圍火器齊施逆衆驚亂兵勇乘勢擁進盡數殲斃立平賊壘四座餘匪逃

竄博望之賊隨亦棄壘狂奔過河不及落水死者無算追殺十餘里約斃賊八九百名生擒僞帥五名賊衆二十二名各等語除飭令趕緊攻勦以圖克復外查把總謝用貴千總蔣占元隨征數載打仗奮勇今臨陣捐軀應請

旨飭部從優議卹奏入

上命軍機大臣傳諭和春張國樑曰此次官兵連日進

攻句容和春張國樑均能親督兵勇擒斬尙多惟該
逆負隅日久牽掣我兵傅振邦攻勦溧水雖經獲勝
我軍亦有傷亡終未得手當此餉缺兵疲豈可日事
遷延不思迅圖克復著和春張國樑督飭傅振邦分
路圍攻速將二城克復再圖併力攻勦鎮江毋得坐
耗餉需自取罪戾

上諭內閣曰此次句容等處勦賊陣亡之參將滿祿等

深堪憫惻均著交部從優議卹

十二日

壬戌

福建道監察御史張雲望奏言臣惟

行軍決勝全在領兵大員若不得其人必致貽
誤軍務聞江南大營有保升總兵之副將王浚
曾在廣東署南雄協於道光三十年英德清遠
盜匪滋事失機叅革後投效廣西軍營夤緣開
復洊升今職該員恇怯無能前在向榮軍中進

勦事機每爲所誤上年五月賊由金陵城北竄
出向榮因張國樑等先已派往溧水等處福興
又不敢出隊此外別無領兵大員卽令該員前
赴仙鶴門攻勦連戰失利緣該員平日於兵餉
每有剋扣是以兵不用命敗至馬羣地面致大
營不能紮住退守丹陽維時營中兵勇聲言大
帥如將該副將軍法從事我等奮勇爭先同心

殺賊該員懼犯衆怒請假經旬茲聞和春復令該員充當翼長營中將士均聽指揮和春在江南未久或未知該員平日行爲惟當防勦喫緊之際而以此衆心不服之員畀以重權貽誤非淺可否請

旨飭下和春令其秉公查覈據實具奏則士氣作而決勝可期矣奏入

上命軍機大臣傳諭和春曰御史張雲望奏副將王浚
恇怯無能屢經獲咎又復營私扣餉致失兵心值此
防剿喫緊之際未可畀以重權等語和春初到江南
未必知王浚債事前情今既有人指叅著該大臣秉
公查辦據實嚴叅毋得稍存回護致誤大局再朕聞
江南大營壯勇過多往往不能打仗徒費錢糧甚至
於丹陽一帶潛行劫掠以營盤爲藏身之地地方官

無從拏辦當此軍餉支絀急應裁汰浮濫況此輩行同賊盜豈可令其匿跡軍營著和春卽將無用之勇裁撤並查明滋事各勇拏交地方官嚴行審辦以肅軍律又聞營中委員實在辦事者無多此外皆徇情濫收希冀保舉圖得薪水其中奸滑之員竟以軍營爲利藪軍士每憂缺餉而若輩轉坐享膏腴尤爲可惡並著和春查明將各營濫設委員嚴行裁汰以期

餉歸實用不致虛糜

十三日

癸亥

福建巡撫慶端奏言江右逆匪自分

股攻陷建陽崇安泰甯建甯等縣城後復於四月初一日竄陷汀州府屬之甯化縣城初七日又分股竄陷汀州府城暨清流歸化等縣城查汀郡所屬地方與江廣兩省接壤並與上游之延平下游之龍巖漳州處處毗連現當延建軍

務喫緊泉州府城亦被匪攻撲茲汀州郡縣各
城復先後被陷亟應迅撥勁兵速圖克復以杜
蔓延已飛咨督臣王懿德迅卽撥兵募勇分赴
援剿其失守文武各官下落另行查明分別辦
理奏入

上命軍機大臣傳諭王懿德慶端曰江西逆匪竄入閩
省地方邵武失陷建甯被圍近又竄陷汀州府城暨

甯化清流歸化而泉州府城亦被匪徒乘機攻撲下
游騷動各處蔓延情形深爲可慮前已諭令葉名琛
撥兵二千名赴閩本日又令添撥一千或數百名星
馳助勦惟汀泉二府相距寫遠泉州與福州省城較
近自應先援泉州或分兵援應汀州已令葉名琛酌
量辦理著王懿德察看情形飛咨廣東先其所急毋
誤事機援兵未到之先應如何調兵分布王懿德已

赴延平居中調度慶端駐守省垣務須嚴扼要隘以待調齊兵勇分路進剿浙省援兵是否已到建郡擊退賊匪後能否撥兵固守堵禦邵武賊蹤汀州等屬失守詳細情形及文武各員下落著慶端一併具奏

上又命軍機大臣傳諭葉名琛曰閩省賊勢蔓延兵力單薄王懿德現往延平居中調度若無鄰省重兵救援恐成瓦解之勢前諭葉名琛調撥廣東兵二千名

並接濟口糧諒已遵照辦理惟彼時止爲援應邵武
一府起見今汀州失陷泉州被圍恐兵力尙屬不敷
著葉名琛再行酌量添調或一千名或數百名派委
得力大員一併統帶星馳赴閩其經由道路泉州偏
近省城自應先援泉州次及邵武而汀州雖與廣東
接壤距泉州尙遠能否分兵協勦之處並著葉名琛
斟酌辦理毋誤事機

同日安徽布政使李孟羣奏言 臣奉

旨赴廬援剿探得霍六賊匪屯聚流波磳一帶爲豫楚
皖三省之交未知欲向何竄卽擬由霍六進兵
將阻援之賊節節剿洗以期漸達廬州乃自英
山克復後敗匪東竄太湖糾合大股數萬徑撲
蘄州之張家塆查該處一由青石嶺大路可達
蘄州一由獅子口小路可通蘄水均爲楚之要

隘且可襲黃梅大軍之後臣接奉督臣官文撫
臣胡林翼檄函會勦自當先其所急惟所帶勇
僅二千五百名兵力單薄因添募精勇二千五
百名分派都司盧又熊等會同彭應鯉馳往獅
子口勦辦自帶遊擊張得勝等勇丁千餘人紮
駐英羅之交調度策應兼防霍六之賊並因蘄
州一路相距較遠力難兼顧又飛請督撫臣派

撥兵勇數千人由蘄州青石嶺大路相機迎勦
四月十八日青石嶺頭隊稍爲失利彭應鯉隨
同臣軍由水路馳往援應出賊不意橫截掩殺
賊遂敗退回巢二十三日探聞青石嶺各營因
衆寡不敵稍有退卻臣軍及彭應鯉等於二十
四日雖復要擊獲勝亦因兵單退屯洗馬販擬
待各軍齊到再行進攻臣恐賊匪乘虛而進卽

復添募精勇一千五百人派參將趙鴻舉等帶
領助勦督令各營刻卽進紮陳家壩一帶嚴堵
蘄水羅田一路制賊勢以待援兵臣復咨調請
依璋阿馬隊百餘名協勦軍威頓振並飛稟督
撫臣速添重兵援勦蘄州一路已聞江甯將軍
都興阿親帶馬隊往勦或可無深入之虞現又
探得霍山六安之賊有竄至豫省商城界者有

進窺英山欲竄張家塆合股者皆與羅田之松
子關相近該縣團勇已調赴兩蘄人心復震臣
已飭張得勝探明截勦如賊勢猖獗惟有將趙
鴻舉等調回親督進勦而留千餘人交朱啟仁
統帶會勦蘄州之賊計蘄州賊匪痛勦後必仍
退竄太湖宜由湖北卽分一軍跟蹤追勦不特
可免回竄且可與黃梅大軍夾攻宿太之賊臣

卽可整隊由霍六一帶專辦各股賊匪肅清皖
豫交界與諸軍會勦惟現與廬郡文報不通以
專兵辦賊尤必須以專餉養兵臣所部勇丁六
千五百餘名長夫二千餘名所有官弁薪水勇
糧夫價打仗賞卹轉運雜支計每月需銀三萬
兩此時皖廬道阻轉餉維艱鄂省續撥餉銀支
放已盡現接撫臣函稱省儲空虛不能接濟惟

有仰懇

天恩飭撥專餉以資勦辦並懇

飭下湖北撫臣不拘何款仍先借撥銀二萬兩暫濟眉

急臣以孤軍當三面之賊山路多歧惟當裹糧疾進連挫兇鋒乃可杜其勾結若度支告匱待哺窘窘驅之前行恐難以枵腹從事臣蒙

恩升授皖藩於江北全省大局責無旁貸將來漸達廬

州與諸軍會合仍當與撫臣兵食全籌力求撙
節惟閩皖省兵冗餉絀加以連年荒歉各屬蹂
躪之餘十室九空錢糧捐輸未能踴躍而道路
爲賊阻擾商販不通稅課亦無所出臣愚以爲
此次勦蕩得手務在慎選良吏撫綏耕氓招徠
商賈然後餉有可籌而目前仍須有勦賊之兵
有養兵之餉乃可次第肅清整頓也

李孟羣又奏言查江北之賊以安慶爲根株舒
桐宿太則其枝葉而愈勦愈多者實因賊匪裹
脅饑民勾連捻匪或分陷州邑或聚抗官軍竊
維今日時勢在扼保全淮以通餉道而尤在固
結人心以遏亂萌臣之一軍當數面之賊尙覺
精銳可戰然官軍之勦賊乘勝席捲惟當有進
無退其防禦本境之團練亦須認真出力乃可

助官軍之勢皖之六霍英太諸州縣與湖北之
蘄州蘄水河南之固始商城皆犬牙相錯賊腹
衆多誠恐此勦彼竄團練鄉兵必不可少臣日
來多方曉諭督同各縣官接見士紳實力激勸
並遴選團練以專責成勸令自籌經費精練勇
丁又聞從前有勒捐擾民之弊出示嚴札曉以
大軍所至除莠安良斷不准將弁及地方官勒

捐苛斂惟此齊團固留寓兵於農之成法須民
間勸勉集事日來各處團練漸有起色已據代
理英山縣知縣廖新會同前署知縣葉傳樾稟
稱帶領團勇堵擊張家塆後路以防回竄並於
界連太湖各山隘分屯防堵以制橫衝又據探
霍六山鄉團練近日堵擊零匪頗有斬擒臣於
據報之時皆委員親齎功牌錢米先示薄獎而

各屬尙有因勇糧無出催集不齊或臨敵畏蒞
或出貲觀望者全賴公正紳董實力勸導又賊
所過之地往往裹脅良民爲之擔負輜糧或偪
令蓄髮尤賴忠義士紳開誠化導收保團結使
民不從賊而知恨賊然後可以滅賊而非稍優
其鼓勵無以振作其急公慕義之誠又臣軍入
山勦賊食米斷缺幸有蘄州在籍主事駱敏修

勸令本籍富紳捐助米糧擔負入山以資接濟
而一軍之軍裝器械所費不貲因臣無款採辦
亦有解營濟用者此等不動正餉有益軍需似
應酌加鼓勵合無仰懇

天恩准

臣於領兵進剿克復城池後將團練殺賊及捐
貲練勇著有實績者擇尤酌保其在臣營捐助
米糧軍裝者一併隨時奏請獎敘以昭激勸則

能挽駛必須添派勁旅繞至賊後上下夾勦方能得手又據署建甯府知府劉翊宸稟稱城外賊匪四面圍攻忽聚忽散四月十八日賊於東門挖掘地道轟坍城垣五丈餘逆匪蟻擁而上經兵民奮力擊退殲斃百餘名一面將轟坍城垣築補惟該逆偷挖地道不止一處刻刻可危等語臣已飭趙印川悉統精銳星馳往援並飭

已革守備龔正勳帶水師精兵二百名隨後策
應署遊擊惠壽帶練勇五百名由間道疾趨建
郡約會趙印川上下兜剿復飛函密飭劉翊宸
率敢戰之士出城接應一面徧諭鄉民齊團助
剿計旬日之間剿辦可期得力現福建水師提
臣鍾寶三已由浙帶兵起程來閩令其由福甯
甯德政和一帶直達建甯統率剿捕遊擊畢定

邦所帶漳勇亦由浙進紮建甯所屬浦城縣境
據稱勇力較單未便孤軍深入現經飭令繞道
前進儘得生力各軍會合剿辦振軍威於新挫
之餘以次進剿恢復各城庶可轉危爲安至汀
州距延較遠土匪叢起文報梗阻現接各屬探
稟甯化縣被賊竄擾歸化清流永定等縣防務
喫緊臣業將前調赴延之漳州兵一千名及遊

擊池金鼇所帶漳勇三百名一併改調赴汀又
前募潮勇一千名催令剋日雇備統交汀漳龍
道英樸調遣進剿此外密邇寇氛之福甯各屬
均飭一律嚴防不准稍有疏懈惟閩省各標精
兵先後派赴上下游防剿現在兵力尙單必須
添募精勇以助其不足查江蘇上海道吳健彰
前克復上海時深得廣勇之力該員現在蘇省

聞其從前所帶廣勇尙在上海一帶貿易已飛
咨江蘇撫臣飭令吳健彰就近召募廣勇五百
名雇坐快艇由海道自行管帶來閩聽候調遣
奏八

上命軍機大臣傳諭王懿德慶端曰前據慶端奏逆匪
攻陷建泰二縣後復竄甯化縣城並連破汀州清流
歸化府縣城池此次王懿德奏報僅及建甯府勦賊

並甯化縣被擾等語自因文報梗阻未能遽知汀郡情形汀州所屬多與江廣兩省壤地相接並與上游之延平下游之龍巖漳州處處毗連賊勢蔓延亟應杜其旁竄現在建郡城圍未解該逆已於雞公嶺築堡安礮阻我進兵之道鍾寶三援師能由福甯直達建甯卽可令與趙印川所統兵勇上下撓勦以分賊勢建陽逆蹤未退則順昌扼守宜嚴延平雖係三面

受敵之地王懿德旣抵郡駐師正可居中策應兼顧
建汀兩路以爲省垣屏蔽惟林俊率黨復在泉州圍
撲府城著飭署提督張廣信悉數殲除俾下游早就
肅清庶上游不致牽掣前曾諭令葉名琛於前撥精
兵二千名外再酌添一千名或數百名一併赴閩助
剿王懿德惟當先就現有兵力周密布置以剿爲防
不得專待客兵致滋貽誤

十九日己陝西巡撫曾望顏奏言湖北襄樊餘

匪竄入均州之武當山踞險設卡爲負隅之計

署延綏鎮總兵龍澤厚與湖北候補道唐訓方

約期分路進剿五月初三日我兵直逼賊卡礮

斃獅子峯拜殿卡之賊五十餘名復將燕子峯

吊鐘臺之賊擊斃多名署遊擊吳永慶率兵勇

冒險前進連破頭天門等三卡斃賊數十名初

四日吳永慶率外委韓舉持矛先登各路槍礮
齊進匪勢不支遂克白虎埡唐訓方之勇亦攻
克燕子峯吊鐘臺等險護參將盛玉率衆奮勇
前進攻克獅子峯直上拜殿該匪逃竄兵勇追
殺二百餘名墮崖死者無數餘俱奔入山寨登
陴固守又有賊百餘縋崖逃遁經署守備李蘊
和伏兵截殺六十餘名生擒四十八名署遊擊

李鳳山等帶兵分截亦擒獲多名首逆江紹田等仍率黨守寨死拒初五日龍澤厚與唐訓方密商遣前次投誠之張興朝將該逆等陸續誘出押入營中除新被擄入者給護票路費遣散外其餘首從悉行殄戮所有此次最爲出力之都司吳永慶可否

賞加勇號以應升之缺儘先升用都司盛玉可否

賞戴花翎至龍澤厚唐訓方和衷共濟迅掃賊氛應如
何獎勵之處恭候

聖裁其餘在事出力員弁兵勇擬查明彙請鼓勵奏入
上諭內閣曰襄獎餘匪竄踞武當山負嵎抗拒經署總
兵龍澤厚商同候補道唐訓方分路進剿掃穴擒渠
勦辦得手所有尤爲出力之都司吳永慶著賞給阿
木爾罕巴圖魯名號以應升之缺儘先升用盛玉著

賞戴花翎副將龍澤厚候補道唐訓方督兵會勦迅速藏事地方得以肅清龍澤厚著賞戴花翎唐訓方著交軍機處記名遇有湖北道員缺出請旨簡放其餘出力員弁兵勇著該撫查明彙請獎勵

二十日
庚午

上諭內閣曰許乃釗著賞給三品頂戴前往江南和春軍營辦理文案

二十四日

戊甲

福濟鄭魁士奏言廬州當南路之

衝地勢寬平四通八達六安在其西舒城廬江
在其南巢縣無爲在其東均爲賊踞我軍東向
賊必西來我軍南攻賊必東西並至先須厚集
兵力除留守廬城外諸路同時進發使賊首尾
不能相顧乃可成功而自桐城退守以來兵勇
傷殘彫瘵經臣等裁汰疲弱尙未補還原額惟

就現有兵力分派布置東路和含滁全一帶飭
令音德布堵禦江賊督同地方官紳相機剿辦
互爲策應至巢縣焦湖北岸處處可以內竄又
令吉順駐兵柘皋偵探賊蹤嚴密堵剿其西北
一路業經署廬鳳道金光飭克復正陽署潁上
縣知縣程鈺固守力擊獲解城圍而正陽又值
捻匪逼近金光飭須留該處扼剿未能直擣六

安現派道員李元華會同該州知州茅念劬籌
捐募勇以圖進攻至廬州一軍實爲南路根本
臣鄭魁士會同麟瑞等實力巡防該匪屢由舒
城三河深入窺伺節經出隊擊回頗有斬擒臣
福濟駐扼梁園居中調度兼護餉道日來廬境
雖保無虞而欲拔營進剿實苦兵力不敷查新
任藩司李孟羣統帶楚師由鄂起程尙未知行

抵何處若遷延過久不獨貽誤進攻且南路大局亦有關礙應請

旨飛飭河南湖北各督撫催令兼程來廬實於地方軍務兩有裨益奏入

上命軍機大臣傳諭福濟鄭魁士李孟羣曰皖省軍務自桐城退守以後六安等處均爲賊踞自應厚集兵力以圖攻勦李孟羣一軍由霍六一帶節節進攻並

非遷延不進該藩司已入安徽境內福濟等何以不通消息至於請旨飭催著卽探明李孟羣行至何處自行札商囑令酌量緩急相機前進儻沿途賊匪尙煩兵力亦豈能舍應剿之賊專以保守廬州爲事耶福濟鄭魁士先就現有兵勇妥爲布置實力防勦毋稍疏失

二十八日

戊寅

王懿德奏言逆匪圍攻建郡在白

沙溪一帶紮營數座拒我援軍四月二十四日
三次來撲我曾經代理按察使趙印川督兵勇
擊退斃匪百餘二十六日該匪復糾黨四五千
來撲趙印川派護遊擊惠壽等各帶兵勇分路
迎勦正在鏖戰有悍賊千餘由山頂衝下逆夥
千餘由山徑抄出我軍奮勇迎擊殲斃數百名
逆眾潰竄西岸賊船駛至亦經同知陳維漢督

廣勇礮船立時擊退二十七日遊擊畢定邦一
軍由水吉北津一帶駛舟直下衝破賊圍殺賊
二百餘二十八日畢定邦帶勇直攻賊寨該逆
分股出拒護遊擊吳鴻源率水師截賊後援斃
賊數十名副將馬玉元開西門出擊亦殺賊數
名五月初一日趙印川督諸軍分隊進勦斃賊
數百沿途賊營悉行燒燬該逆退竄枇杷嶺一

帶城圍立解查趙印川所統兵勇不滿二千躬
冒鋒鏑力挫兇鋒署建甯府知府劉翊宸在圍
城中兵勇僅止九百獨能固結衆志卒保危城
以待援師建郡紳民深明大義屢助官軍殺賊
均堪嘉尚除飭趙印川遴帶勁旅乘勝掃蕩規
復各城外所有此次戰守尤爲出力員弁兵勇
紳民俟確查後分別懇

恩獎勵奏八

上諭內閣曰逆匪圍攻建甯府城經代理按察使趙印川督率兵勇擊退立解城圍辦理尙屬得手署建甯府知府劉翊宸會同文武固守深得民心該紳民等屢助官軍殺賊共保危城均堪嘉尙所有此次出力文武員弁兵勇紳民准其擇尤保奏仍著王懿德督飭在事文武迅將匪徒乘勢剿滅克復邵武等處城

池毋任延蔓

王懿德又奏言江西大股逆匪由光澤縣之鐵牛關等處闖入滋擾用地雷轟陷光澤縣城官兵勇悉遭戕害邵武郡縣相繼淪陷該逆張貼僞示恐嚇居民上游民氣柔弱聞警遷逃倉猝之間連陷崇安建陽其汀郡甯化清流歸化等縣被該逆勾結土匪先後竄擾連城縣亦已

失守所有守土各官或捐軀殉難或棄城逃避
或尙無下落除飭查分別辦理並督飭在事員
弁實力堵勦迅圖克復外臣與撫臣慶端未能
先事籌防應請

旨交部嚴加議處奏入

上諭內閣曰王懿德奏江西逆匪竄入閩境邵武等處
相繼失守請與巡撫一併嚴議等語王懿德慶端均

著加恩改爲交部議處